

1 JUAN

Jesucristo ded pah ã jumat

¹ Ded pah Jesucristo ã jumatjidih yeebdíh wã naóh daácna caá. Jesucristo biíhmah jumni,* ded pah Dios ã jumatdih naóhni, cãacwã Diosjeéh páantjeh jumat túutnibut át jumup wut jĩ. Dios cãacwãdih ded pah ã naáwátidih Jesúsboó naóh yapani ã jumup jĩ. ã naáwáchah joinít, jwiítjeh caandíh jwĩ enep jĩ. Jwiítidih ã dwo wáyachah, caandíh jwĩ pej jumup jĩ.

² Jesucristo cãacwãdih páantjeh jumat túutni, nin baácboó ã júuwát pínah jãtih ã íp Diosjeéh jumniiji nin baácboó át cãac jumup tajĩ. Caandíh enniti bue ãih doonádih yeebdíh wã naóhna caá.*

³ Jwĩ íp Diosjeéh, ã wũh Jesucristojeéhbut jwĩ túi jumna caá. Pánihna, yeéb jwĩjeéh, jwĩ ípjeéh, ã wũhjeéhbut ñi túi jumat pínah niijná, jwĩ ennijidih, jwĩ joiníjidihbut yeebdíh wã naóhna caá.

⁴ Bícdih wẽinit jwĩ jumat pínah niijná, nindih yeebdíh wã daácna caá.

Baabát panhipboó jwĩ jumat

⁵ Dios wũh jwiítidih ã naóhniiji bohéatidih bue yeebdíh wã naóhna caá. Dios túini yoobát jumna, baabát panihni caá. Dedé yéejat wihcah, dupúat caandíh ã wihcan caá.

* **1:1** Jn 1.1,4; 6.68; 1Jn 2.13-14 * **1:2** Jn 1.14,18

⁶ Jwiít yeejép chājnit, dupúát panhipboó jumna yuhna, “Diosjeéh wã túi jumna caá”, niijnít, yeena caá jwĩ chājap. Dios ã náahat pah jwĩ chājcan caá.

⁷ Obohjeéhtih, túi chājnit, baabát panhipboó Dios ã jummat pah muntih jwiítbut jumna, ãjeéh jwĩ túi jumna caá. ãihwãjeéhbut jwĩ túi jumna caá. Caandíh jwĩ jepahat jíib, Dios ã enechah, ã wãúh Jesucristo cruzboó wun wãhnit, ãih meépjh jwiít dih yéejat wihcannit pah ã chājna caá.

⁸ “Weém bácah yéej chājni nihcan caá”, niíj jenah joinít, yeeatdihjeh jwĩ jenah joiná caá. Páant niíj jenah joiná, Dios naáwát dih jwĩ túi jenah joicán caá.

⁹ Obohjeéhtih, jwĩ yéej chājatdih Diosdih jwĩ naáwáchah, caandíh ã quíib buebdípna caá. “Dios yoobóp dih jumni ã niiját pah ã chāj bipna caá”, jwĩ niíj jéihna caá.

¹⁰ “Weém yéej chājni nihcan caá”, niíj jenah joiná, “Dios yeeni caá”, niijnít, ã naáwát dih jwĩ náahcan caá.*

2

Jesucristo jwiít dih ded pah ã teo wáacat

¹ Wã weh panihnítá, yeéb yeejép ñi chājcat pínah niijná, nindih yeebdíh wã daác wahna caá.* Obohjeéhtih, jwĩ yéej chājachah, Jesucristo, yéejat wihcanni, ã íp dih jwiít dih ã naóh teo wáac bipna caá.

² Jwiít yéejnit jwĩ jumuchah, jwĩ yéejat Diosdih ã jáhna caá. Dios bíic dih jwĩ túi jummat pínah niijná, Jesucristo jwiít dih ã wun wãhap jĩ.* Jwiít dihjeh

* **1:10** Pr 20.9 * **2:1** Ro 6.11-14 * **2:2** 1Jn 4.10

nihcan, nihat baácdih moón jwĩ yéejatdih yohat túut niijná, ã wɛn wũhɛp jĩ.

³ Dios ã wɛtat pah chãjna, “Ájeéh wã túi jumna caá”, jwĩ niij jéihna caá.*

⁴ Obohjeéhtih, bita “Diosjeéh wã túi jumna caá”, niijná yɛhna, ã wɛtat pah chãjcan, yeenit caá. Pánih yeenit, Dios naáwát dih ï jéihcan caá.

⁵ Obohjeéhtih, biíhboó ã wɛtat pah chãjni Diosdih ã túi oina caá. Diosjeéh jwĩ túi jumatdih nin pah jwĩ jéihbipna caá:

⁶ Ded Diosjeéh túi jumni Jesucristo ã chãjatji pah mɛntih caanbát ã túi chãjbipna caá.

Jáap wɛtat

⁷ Wã oinitá, yeebdíh bɛɛ wã daácní jáap wɛtat nihcan caá. Jon jãtíh ñi jéihni wɛtatjeh tígaa. Yeebdíh Jesúih doonádih jwĩ naáwáchah, nin wɛtatdihbɛt ñi joyóp jĩ.*

⁸ Obohjeéhtih, máa wɛtat yɛhna, jáap wɛtatbɛt ã jumna caá.* Cristo nin wɛtatdih jepahnit, jwiít cáacwãdihbɛt ã oyat túutɛp jĩ. Dɛpúát panihpboó ñi jumɛchah, Cristo nin baácna jũóhnit, caán dɛpúát dih ã baabánap jĩ. Pánihna, ã baabáát panihpboó jumnit, Cristo ã oyat túutatdih ñi jepahna caá.

⁹ “Weém baabápboó jumni Dios ã wɛtatdih jepahni caá”, niijná yɛhna, ã dée panihni Jesúih dih eníhcan, Dios ã wɛtatdih jepahcan, dɛpúnarboó jumni caá.

* **2:3** Jn 14.15,21,23 * **2:7** 2Jn 5-6 * **2:8** Jn 13.34; 15.12

10 Ded ã dée panihnidih oini baabápboó ã jumna caá. Pánih oina, caandíh dedé buugát panihni ã wihcan caá.*

11 Obohjeéhtih, ded ã dée panihnidih eníhcan, dupánapboó ã bejna caá. Pánih bejna, jéih encanni panihni ded pah ã chãjatdih ã jéihcan caá.

Cristodih túi jenah joyát ded pah ã jummat

12 Wébítá, Cristo ã wun wāhatjīh ñi yéej chãjatdih ãt yohop taga. Pánih yéejat yohnit ñi jumuchah, yeebdíh wā naóh daácna caá.

13 Behnitá, yeéb biíhmahjeh jumni Cristodih ñi túi jéihna caá. Caandíh túi jéihnit ñi jumuchah, yeebdíh wā naóh daácna caá. Japatá, yeéb nemépwā ĩ maáhdih ñit yap yohop taga. Pánih yap yohnit ñi jumuchah, yeebdíh wā naóh daácna caá.

14 Wébítá, jwī ípdih ñi túi jéihna caá. Caandíh túi jéihnit ñi jumuchah, yeebdíh wā naóh daácna caá. Behnitá, biíhmahjeh jumni Cristodih ñi túi jéihna caá. Caandíh túi jéihnit ñi jumuchah, yeebdíh wā naóh daácna caá. Japatá, Dios naáwátidih túi jepahnit, wēp ñuhnit panihnit ñi jumna caá. Pánih jumnit, nemépwā ĩ maáhdih ñit yap yohop taga. Páant ñi jumuchah, yeebdíh wā naóh daácna caá.

15 Diosdih jéihcannit ded pah ĩ en ñinahatdih ñi en ñinahca bojoó. Ded queét panihni jwī ípdih ã oican caá.*

16 Diosdih jéihcannit nin pah ĩ jumna caá: Yeejép chãjatdih ĩ en ñinahna caá. Bíí déedih wēi ennít, ĩ bíbohíh jenah joiná caá. Dawá bíí déedih bíbohna, “Weém bita chah túini wā jumna caá”, ĩ níj jenah

* 2:10 Ro 13.12-14 * 2:15 Stg 1.27

joiná caá. Jwĩ lípboó páant ã jenah joyát túutcan caá.

¹⁷ Nin baác ã buudúchah, ded pah cãacwã yeejép ã náah jenah joyátbut ã buudbípna caá. Obohjeéhtih, Dios ã náahat pah chãjnitboó páantjeh ãjeéh ã jumbipna caá.

Yoobópdih naáwát, yee naáwát

¹⁸ Wehá, nin yeó jáapna buudát pínah tóah jũóhna caá ã chãjap. “Cristodih tubit en jũihni ã jumbipna caá”, ã niijíchah, ñiát joiná jĩ. Pánihna, buu dawá ã jũúwát dih jéihnit, “Péeni yeó jáap bahnijeh ã judhna caá”, jwĩ niij jéihna caá.

¹⁹ Queét Cristodih en jũihnit jwĩ cãtíh jumna yuhna, jwiít dih ã éemp yoh bacap jĩ. Páant ã bacatdih ennit, Jesúihwã yoobát ã nihcatdih jwĩ jéihna caá. Queét ãihwã nihna, jwĩjeéh ã ita chão tágaá. Jwĩjeéh páantjeh ã jumachah nihna, Cristodih en jũihnit ã jummatdih jwĩta jéihcan tagaá.

²⁰ Obohjeéhtih, yeebdíh Túini Espíritu ã jumachah, yeéb nihat Cristoíh dooná yoobópdih ã jummatdih ñi tái jéihna caá.*

²¹ Yeebdíh naóhna, “Queét ã tái jéihcan caá”, wã niij jenah joicán caá. Obohjeéhtih, tái jéihnit ñi jumachah, yeebdíh wã naóh daácna caá. Caán dooná dedé yeeat ã wihcatdih ñi tái jéihna caá.

²² Nin pah caá yeeni ã niijíp: “Jesús Dios ã wahni nihcan caá”, ã niijná caá. Ded “Jesús Dios wãúh nihcan caá”, niij naóhni Jesucristodih, jwĩ líp Diosdihbut en jũihni caá.

* **2:20** 1Co 2.10-16

23 “Dios wãúh Jesús nihcan caá”, niijní jwĩ íp Diosjeéh ã túi jumcan caá. Obohjeéhtih, “Jesús Dios wãúh caá”, niijníboó jwĩ ípjeéh ã túi jumna caá.

24 Yeéb Jesúsdiñ jwíh jepahnit, ded pah ã jummat doonádiñ ñi joyóp jĩ. Páant ñi joyátjidiñ ñi túi náhninaá. Pániñ náhninit, Jesúsdiñ, ã ípdihbat ñi túi pej jumbiñna caá.

25 Nin pah Jesús jwiít ãihwãdiñ ã niij naáwáp jĩ: “Yeéb wãjeéh páantjeh ñi túi jumbiñna caá”, ã niijíp jĩ.

26 Yeebdíñ yeenitdiñ ñi joyáh bojat pínah niijná, wã naóh daácna caá.

27 Jesucristo yeebdíñ Túini Espíritudiñ ãt wãhup taga. Ñijeéh jumnit, yeebdíñ ã túi bohéna caá. Yoobópdíñ bohéna, yeeatdiñ ã naóhcan caá. Páant ã bohénachah, biíh bohénidiñ ñi náahcan caá. Pániñna, ã bohéatdiñ joí cádahcan, Cristojeéh páantjeh ñi túi jumú.

28 Páant tigaá, wehá, Cristojeéh páantjeh ñi túi jumú. Pániñ jumnit, ã jwúub dei jũwúchah, úmcan, ñi tíccan niít.

29 Jesucristo túini ã jummatdiñ yeéb ñi jéihna caá. Pániñ jéihnit, niñat túi chãjñit Dios weh ï jummatdihbat ñi jéihna caá.

3

Dios weh jwĩ jummat

1 Jwiít diñ bainí oican, “Yeébboó wã weh caá”, Dios ã niijná caá. Æ oinit jumna, jwiít ã weh caá. Pániñna, yéej chãjñitboó Diosdiñ jéihcan, jwiít ã wehdihbat ï jéihcan caá.*

* 3:1 Jn 1.12

² Wã oinitá, b̄ūū Dios weh jwĩ jumna caá. Obohjeéhtih, ded pah jwĩ jummat pínahdih jwĩ túi jéih jw̄hcan caá. Jesucristo ã jígohochah, caandíh ennit, ded pah ã jumatdih jwĩ túi jéihbipna caá. Pániñ jéihnit, caán ã jummat pah m̄untih, jwíitbut jwĩ jummat pínahdih jwĩ jéihna caá.

³ Det Jesucristo ã jw̄ūub dei j̄ūwát pínahdih p̄ainitboó yéej ch̄aj cádahnit, ã túi ch̄ajat pah m̄untih ĩ túut n̄ūmná caá.

⁴ Nihat yéej ch̄ajnit Dios ã w̄atdih yap yohnit caá. Dedé yéej ch̄ajat Dios ã w̄atdih yap yohat ã jumna caá.

⁵ C̄aacwã ĩ yéej ch̄ajatdih yohni pínah Cristo ã c̄aac jummatdih ñi jéihna caá. Caánboodíh yéejat wihcan caá.*

⁶ Ded Cristo biícđih jumni páantjeh ã yéej ch̄ajca bojo naáh. Obohjeéhtih, ded yéej ch̄aj cádahcan, Cristodih jéihcan, ãih nihcan caá.

⁷ Wã oinitá, yeebdíh yeenitdih ñi joyáh bojoó. Nihat túi ch̄ajnit Jesucristo yoobópdih ã jummat pah m̄untih, queébtut yoobópdih ĩ jumna caá.

⁸ Obohjeéhtih, yéej ch̄ajniboó nemépwã ĩ maáíh ã jumna caá. Nemépwã ĩ maáh bácah, biíhmahjeh yeejép ch̄ajni caá. Páant ã ch̄ajatdih yoh beedáni pínah Dios w̄ūh nin baácboó át c̄aac jum̄up tajĩ.*

⁹ Det Dios weh jumna, jwĩ íip Dios ã jenah joyát pah queédihbut át jenah joyát túut̄up taga. Pániñ jenah joinít, ã w̄epat ĩjeéh ã jum̄uchah, páantjeh ĩ yéej ch̄ajcan níit.

¹⁰ Nin pah Dios weh, nemépwã ĩ maáh wehbut ĩ jummatdih ñi jéihbipna caá: Túi ch̄ajcannit, ĩ déewãdih

* 3:5 Jn 1.29 * 3:8 He 2.14-15

oicannit Dios weh nihcan caá. Nemépwã ã maáh weh ã jumna caá.

Jesúhwã ã míc oyat

¹¹ Yeéb Jesucristodih jwíh jepahnit, “Míc oyat caá náahap”, jwí níj bohéatdih ñi joyóp jĩ.*

¹² Caín ã jumati pah ñi jumca bojoó. Caán nemépwã ã maáh jumna, ã úddih át mao yohop wut jĩ. ¿Dépanih tigaá ã úddih át mao yohji? ñi jenah joyóchah. Caandih yeebdih wã naóhbipna caá. Caín yéej chãjni jumna, ã údboó tái chãjni ã jumati dih íjnit, caandih át mao yohop wut jĩ.*

¹³ Páant tigaá yéej chãjnitboó yeebdih ã eníhcan caá. Pánihna, ã en jũihñuchah, “¿Dépanih tigaá weemdih ã en jũih?” ñi níj jenah joicá bojoó.

¹⁴ Yeejép chãjnit, iiguípna bejnit pínah jwí jumap yuh jĩ. Obohjeéhtih, buu jeáboó bejnit pínah jumna, táiniboodih táut nuumná caá jwí chãjap. Jesúhwãdih oina, jwiít dih ã táut nuumát dih jwí jéihna caá. Ded cáacwãdih oicanni iiguípna bejni pínah ã jumna caá.*

¹⁵ Ded ã déedih eníhcan, mao yohíhat jenah joyát caá caandih ã jumap. Pánih jumna, Dios ã enechah, cáac dih mao yohni bíic yoobó ã jumna caá. “Ded mao yohni Diosjeéh páantjeh ã jumcan niit”, ñi níj jéihna caá.

¹⁶ Ded pah oyat ã jumati dih nin pah jwí jéihna caá: Jwiít dih búdí oina, Diosjeéh páantjeh jwí jumati pínah niijná, Jesucristo jwiít dih ã wun wãhup jĩ. Páant ã wun wãhat dih náhninit, “Caán oyat yoobát caá”, jwí níj jéihna caá. Pánihna, jwiítbut

* **3:11** Jn 13.34; 15.12 * **3:12** Gn 4.8 * **3:14** Jn 5.24

wanna yuhna, jwĩ déewãdih túi oinit, teo wáacat caá náahap.*

17 Dawá bií dée bíbohni, ã dée panihni moh yéejnidih enna yuhna, caandih jĩgah en teo wáaccan, Diosdih ã oican caá.

18 Pánihna, wã weh panihnitá, “Bitadih wã oina caá”, niijná, jacjeh pohba niijcát caá náahap.

Ƴumcanjeh, Diosjeéh jwĩ jummat

19 Cãacwãdih túi oina, Dioíhwã jwĩ jummatdih jwĩ jéihna caá. Pánihna, ã peéh chãjat pínahdih Ƴumcanjeh, ãjeéh jwĩ túi jumna caá.

20 “Yéejat jíib weemdih ã jumna nacaá”, jwĩ niíj jenah joyóchah yuhna, Dios nihatdih jéihni jumna, jwĩ jenah joyát dihbat ã túi jéihna caá. Pánih jéihna, ãihwã jwĩ jummatdih jwĩ túi jenah joyát pínah niijná, jwiít dih ã teo wáac bipna caá.

21 Wã oinitá, “Dios wã yéejatdih ãt yoh tagaá”, niíj jenah joinít, Ƴumcanjeh, Diosjeéh jwĩ túi jumna caá.

22 Pánih jumnit, Dios ã wutatdih jepahna, ã weñat pínahdih jwĩ chãjachah, caandih dedé jwĩ wúbát dih jwiít dih ã wãhbipna caá.

23 Nin pah jwiít dih ã wutna caá: “Wã wũúh Jesucristodih túi jenah joinít, bita ãihwãdihbat ñi oyoó”, ãt niijíp wut jĩ.*

24 Dios ã wutatdih túi jepahnitboó ãjeéh ĩ túi jumna caá. Dios ĩjeéhbat ã túi jumna caá. “¿Dios wãjeéh ã jum niít?” jwĩ niíj jéihíchah, Dios jwiít dih ã wũhni Túini Espíritu “Jújuh, Dios majeéh ã jumna caá”, ã niíj jéihyana caá.

* 3:16 Jn 15.13 * 3:23 Jn 13.34; 15.12,17

4

Cristodih eníhcannitdih ded pah jwĩ jéihyat

¹ Wã oinitá, “Túini Espíritu weemdíh nin pah ã niij naáwát túutna caá”, niij yeenit, dawá ĩ jamna caá. Pániha, Dios ã naáwát túutni ã jamatdih jéihyat túut niijná, ded pah ã naáwátđih ñi túi joyoó. Dios naáwát biic yoobó ã naóhcah, ñi joyáh bojoó.

² Yoobópdih Túini Espíritu ã naáwát túutni nin pah ã niij naóhbična caá: “Jesucristo jwiit panihni cáac jamna yuhna, Diosjeh át jamap wut jĩ”, ã niijbična caá. Páant niijní Dios ã wahnĩ ã jamna caá.

³ Obohjeéhtih, nemépwã ĩ maáh ã wahniboó, “Jesús Dios nihcan caá”, ã niijbična caá. Páant niijní Dios ã wahnĩ nihcan, Cristodih en jühniíh caá. Cristodih en jühniíhwã dawá ĩ jamat pínah doonáđih ñitát joi tágaá. Bũu nin baácboó dawá ĩ jamna caá.*

⁴ Obohjeéhtih, yeébbó, wã oinitá, Dioíhwã ñi jamuchah, Túini Espíritu ñijeéh ã jamna caá. Jesúsđih jepahcannit, nemépwã ĩ maáh ã wēpat chah, Túini Espírituboó ã wēpna caá. Pániha, yeebdíh ĩ yee naáwáchah yuhna, caán ã wēpatjĩh queéđđih yap yohnit ñi jamna caá.

⁵ Queéđboó Dioíhwã nihcah, ĩ bohéátbũt Dioíh nihcan caá. Bita Dioíh nihcannit, ĩ bohéátđih ĩ túi wēi joiná caá.*

⁶ Obohjeéhtih, Dioíhwã jamna, ã naáwátđih jwĩ bohénachah, áihwãboó jwiúđđih ĩ túi wēi joiná caá. Diosđih jéihcannitboó, jwĩ naáwáchah, ĩ joíhcan caá.

* 4:3 Mt 7.15; 2Jn 7 * 4:5 Jn 15.19

Pánihna, Dios naáwát dih ded yoobóp dih bohéni, ded yee bohéni ã jumat dih ñi jéihbipna caá.*

Dios oini caá

⁷ Wã oinitá, oyat wēpat Dios jwiít dih ã wãhuchah, bita áihwādih jwī oi jīh. Det bitadih túi oinit Dios weh ĩ jumna caá. Pánih jumnitjeh Diosdih jéihnit, ãjeéh ĩ túi jumna caá.

⁸ Dios oini ã jumuchah, bitadih oicannit, Diosdih jéihcan, ãjeéh ĩ jumcan caá.

⁹ Dios ã wūh biíc jumnidih nin baácboó át wah deyanap tajī, ã wēpatjīh Diosjeéh wēinit, páantjeh jwī jumat pínah niijná. Pánih chājna, ded pah ã oyatdih jwiít dih át jéihyanap tajī.*

¹⁰ Oyat yoobát nin pah caá ã jumup: Diosdih jwī oyat pah nihcan, jwiít dih Diosboó ã oyat pah caá oyat yoobát ã jumup. Jwiít dih bádí oinit, jwī yéejat jīb iiguipna bejat déejidih túi ubat túut niijná, Dios ã wūhdih át wun wãhat túutup wut jī.

¹¹ Wã oinitá, Dios jwiít dih caan páh bádí ã oyochah, jwiítbut túi míc oyat caá náahap.

¹² Nihat Diosdih encannit jwī jumna caá. Obohjeéhtih, jwī míc oyochah, Diosjeh jwījeéh ã jumna caá. Páant ã jumuchah, ã náah yacat pah ã oyatjīh bitadih jwī túi teo wáacna caá.*

¹³ Dios jwiít dih áih Túini Espíritudih át wãhup taga. Páant jwījeéh ã jumuchah, “Dios bícdih wã jumna caá. Wãjeéh caanbút ã jumna caá”, jwī níj jéihna caá.*

¹⁴ Jwī íp ã wūhdih nin baácboó át cãac jumat túutup tajī, cãacwādih ã túi ubat pínah niijná. Páant

* **4:6** Jn 8.47 * **4:9** Jn 3.16 * **4:12** Jn 1.18 * **4:13** Ro 8.9; 1Jn 3.24

ã cãac jummat tãutnijidih jwiítjeh jwĩ enep jĩ. Pãnih ennitji, bitadiah jwĩ jéih naóhna caá.*

15 “Jesús Dios wãúh caá”, niijníjeh Diosjeéh ã tãí jumna caá. Diosbat ãjeéh ã tãí jumna caá.

16 Dios jwiítidih ã oyatdih jwĩ jéihna caá. Pãnih jéihnit, caandíh jwĩ tãí jenah joiná caá. Dios nihat cãacwãdih búdí ã oina caá. Pãnihna, ded bitadiah oini Dios biícidih ã jumna caá. Diosbat ãjeéh ã jumna caá.

17 Pãnih Dios biícidih jumna, caandíh, bitadihbat jwĩ tãí oina caá. Pãnih oina, cãacwã ã yéjehat jíib peéh chãjat yeó jáapdih úumcanjeh, jwĩ tãí jumnipna caá. Cristo ã íip Dios biícidih ã jumuchah, jwiítbat nin baácboó jum jwuhna, biíc yoobó caán biícidih jwĩ jumna caá. Pãnih jumnit, ã jwúub dei jéúwúchah, jwĩ úumcan níít.

18 Ded Diosdih oini ã oyatdihbat jéihna, caandíh ã úumcan níít. Pãnih tãí oina, jwĩ oinidih jwĩ úumcan caá. Obohjeéhtih, biíhdih úumna, caán ã peéh chãjat pínahdih jwĩ úum jenah joiná caá. Pãnihna, jwĩ úumnidih jwĩ oican caá.

19 Dios jwiítidih ã oi waáwáchah, jwiítbat caandíh, bitadihbat jwĩ jéih oina caá.

20 Ded ã dée panihnidih eníhcan, “Weém Diosdih wã oina caá”, niijná yuhna, ã yeena caá. Biíhdih enna yuhna, ã oican, Dios ã enca naáhdih ã jéih oican caá.

21 Pãnihna, nin pah jwiítidih Jesucristo ã níj wutup jĩ: **“Ded Diosdih oina, ã dée panihnidihbat oyat caá náahap”**, ã niijíp jĩ.*

* 4:14 Jn 3.17 * 4:21 Mt 5.44-45; Mr 12.29-31

5

Dios weh yéejatdih ï yap yohat

¹ Det Jesús dih “Dios ã wahni Cristo caá”, niijnít, Dios weh ï jumna caá. Det jwĩ líp Dios dih túi oinit, ã wehdihbut ï oina caá.

² Dios dih oina, ã wuatatdih jepahnit, ã wehdihbut jwĩ oyat yoobópdih ã jummatdih jwĩ jéihna caá.

³ Æ wuatatdih jepahnajeh, Dios dih jwĩ túi oina caá.* Caandíh oina, jwiít dih ã wuatat wái náah jumni nihcan caá.*

⁴ Det Dios weh jumna, yéej chãjatdih ï jéih yap yohna caá. Jesucristo ã wēpatdih túi jenah joiná, Dios dih jéihcannit ï jenah joyát pah, jwĩ jenah joicán niít.

⁵ “Jesús Dios wũúh caá”, niíj jenah joiníjeh yéejatdih náahcan, ã yap yohna caá.

Dios wũúh ded pah ã jummat

⁶ Jesucristo nin baácboó ãt cáac jumrup tajĩ. Æ tewat pínah játih, Juan Daabánidih ã daabáát tútup jĩ. Túttimah, cruzboó wun wũhna, ãih meépdih ã yohop jĩ. Pánihna, mahjĩh ã daabáát dih, cruzboó ãih meép ã yohatdihbut náhninit, Dios wũúh ã jummatdih jwĩ jéihna caá. Túini Espíritubut “Nin Dios wũúh tigaá”, jwiít dih ã niíj jéihyana caá. Caán Túini Espiritu yeecan, yoobópdih naóhni caá.

⁷⁻⁸ Pánihna, Jesús Dios wũúh ã jummatdih nit biíc peihcannit jéihyanit ï jumna caá: Túini Espiritu jwiít dih ã jéihyanachah, mahjĩh ã daabáátjidi, ãih meép ã yohatjidi but jenah joinít, Jesús Dios wũúh ã jummatdih jwĩ jéihna caá.

* 5:3 Jn 14.15; 2Jn 6 * 5:3 Dt 30.11; Mt 11.30

⁹ Cãacwãjeh ï naáwáchah joiná, “Caán yoobópdih tigaá”, jwĩ niijná caá. Páant niijnít dih jwĩ joiná yuhna, jwĩ íp ã wũúhdih naóhna, cãacwã ï naáwát chah ã jumuchah, caánboodíh túi joyát caá náahap.*

¹⁰ Dios wũúhdih ded túi jenah joiní “Jesús Dios wũúh ã jummat dooná yoobópdih tigaá”, ã niij jéihna caá. Obohjeéhtih, Dios ded pah ã wũúhdih ã naáwát dih joyáh bojni “Dios yeeni caá”, ã niijná caá.

¹¹ Nin pah Dios jwiít dih ã niij jéihyana caá: “Wã wũúhdih túi jenah joinít, páantjeh wãjeéh ñi jum bípna caá”, ã niijíp jĩ.

¹² Dios wũúh Jesúsdih ded túi jenah joiní, Diosjeéh páantjeh ã jumna caá. Obohjeéhtih, ded Jesúsdih jepahcanni, Diosjeéh ã jumcan níit.*

Juan ã pée naáwát

¹³ Yeéb Dios wũúhdih túi jenah joinít dih naóh daácna caá wã chãjap, páantjeh Diosjeéh ñi jummat pínahdih ñi jéihyat pínah niijná.*

¹⁴ Dios ã náahat pah caandíh jwĩ úbúchah, jwiít dih ã joyátdih jwĩ túi jéihna caá. Pánih jéihna, úmcanjeh caandíh jwĩ úbhna caá.

¹⁵ Páant ã joyátdih jéihna, “Wã úbát dih át wãh tagaá”, jwĩ niij jéihna caá.*

¹⁶⁻¹⁷ Yeéb ñi dée panihni ã yéej chãjachah ennit, Diosdih ñi úbú, ã yéejat jíib caandíh iiguípna ã wahcat pínah niijná. Páant ñi úbúchah, Dios caandíh ã túut numbípna caá, ãjeéh páantjeh ã jummat pínah niijná. Obohjeéhtih, ded Cristodih

* 5:9 Jn 5.32-37; 8.18 * 5:12 Jn 3.36 * 5:13 Jn 20.31 * 5:15 Mt 7.7-11; Lc 11.9-13; Jn 15.7,16; 16.23-24; 1Jn 3.21-22

páantjeh náahcan, yap yohnit, áihwãdihbut eníhcan, iiguípna ã bejbipna caá. Pánihniboodih ñi wúbát pínahdih wã wutcan caá. Nihat yéej chãjat Diosdih yap yohat míic caá. Obohjeéhtih, biih yéej chãjat iiguípna ã bejat túatcan caá. Pánih chãjnitdih caá wúbát náahap, ã túat nuumát pínah niijná.

¹⁸ Dios wũh Jesús áihwãdih ã túi en daoná caá, nemépwã ã maáh queédih ã yéejacat pínah niijná. Pánihna, “Dios weh páantjeh ã yéej chãjcan caá”, jwĩ niij jéihna caá.

¹⁹ “Jwiítboó Dioíhwã jwĩ jumna caá. Obohjeéhtih, nihat Diosdih náahcannitdih Satanás caá ã wutap”, jwĩ niij jéihna caá.

²⁰ “Dios wũh nin baácboó cãac jumnit, Dios yoobát dih jwĩ jéihyat pínah niijná, jwiít dih ã jéihyanap jĩ”, jwĩ niij jéihna caá. Pánihna, Diosjeéh túi jumnit, ã wũh Jesucristojeéhbut jwĩ túi jumna caá. Jesucristo Dios yoobát jumna, páantjeh Diosjeéh jwiít dih ã túi jumat túatna caá.*

²¹ Wã weh panihnitá, jñi túi chãja chaáh! Pãpnidih ñi wëi wúbhca bojoó.

Páant bóojeh tigaá wã naáwát.

Juan

* 5:20 Jn 17.3

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2